

DECLARATION

DV ROY POVR LE

razement & demolition de toutes
sortes de fortifications des Villes
& Chasteaux qui ne sont frontie-
res & importantes au Royaume.



A PARIS,

Chez C. MOREL, P. METTAYER, &
A. ESTIENE, Imprimeurs
ordinaires du Roy.

M. DCXXVI.

Avec Privilege de sa Maieste.

1011

31 1000

1000 1000

1000 1000

1000 1000

1000 1000

Case

F


39

326

1626 fat

no.2

THE HERRY
LIBRARY



OVIS par la grace de Dieu Roy de France & de Nauarre, A tous ceux qui ces presentes Lettres verront, Salut. Sçauoir faisons que comme cy deuant les assemblees des Estats de ce Royaume & celles de personnages notables choisis pour nous donner aduis & au feu Roy nostre tres-honoré Seigneur & Pere sur les plus impor-

tantes affaires de ce Royau-
me, mesmes l'assemblee des
Estats de cette Prouince de
Bretaigne tenue par nous en
l'annee mil six cens quator-
ze, ayant continuellement
requis, & tres-humblement
supplié nostredit feu Sei-
gneur & Pere & Nous, de
faire demolir plusieurs pla-
ces fortes en diuers endroits
de ce Royaume, lesquelles
n'estans ny frontieres des
ennemis & voisins, ny en
passages & endroiets de cō-
sequence, ne seruoient qu'à
augmenter nostre despenſe

sous le nom d'entretènement
de garnisons inutiles, & à la
retraicte de diuerses person-
nes qui aux moindres mou-
uemens incommodoient
grandement les Prouinces
où elles sont scituées : Ce
que nous ayant esté reiteré
par nos subjets des trois or-
dres de cetteditte Prouince
de Bretaigne de present as-
semblez en Estats : Cela
nous a donné subiet de rei-
terer aussi les Ordonnances
qui ont esté cy deuant fai-
tes, tant pour cetteditte Pro-
uince que pour le surplus de

nostre Royaume, afin de re-
trancher d'autant plus la
despense, oster ces occasions
de troubles & remuemens
& deliurer nostre peuple
des incommoditez qu'il en
reçoit, desirans de toute no-
stre affection contribuer
tous les moyens qui nous
seront possibles pour le re-
pos & soulagement de nos
sujets, maintenir les Pro-
uinces en grande tranquilli-
té, oster autant que nous
pourrons toutes les occa-
sions qui peuuent seruir à
les inquieter, & par le retrā-

chement de la despense lequel nous entendons faire en toutes choses, mesmes dans nostre propre maison; diminuer les charges que portent nosdits sujets, lesquels nous auons desia arresté de soulager & descharger de la somme de six cens mil liures sur l'estat des leuées ordinaires en l'année prochaine: Encores que les despenses necessaires & ineuitables surpassent de beaucoup nostre reuenu, pour raison dequoy nous employons volontiers les

moyēs extraordinaires qui nous sont proposez, mesmes à la diminution de nostre reuenu,plustost que de mettre nouuelle charge sur nostre peuple ou manquer à son soulagement,Nous promettant moyennant la grace & benediction que nous esperons de la Diuine bonté, que faisant succeder les bons desseins qu'il luy plaist nous inspirer pour le bien, repos & soulagement de nosdits subjets & prosperité de cet Estat, Nous aurons tous les iours par la conseruation
de la

de la paix , moyen de leur
 faire ressentir plus abon-
 damment les effects de no-
 stre paternelle affection en-
 uers eux. A ces causes de
 l'aduis de nostre Conseil où
 estoit la Royne nostre tres-
 honorée Dame & Merc,
 nostre tres-cher & vnique
 Frere le Duc d'Anjou, au-
 tres Princes & principaux
 Seigneurs de nostre Con-
 seil, ayant esgard ausdites re-
 monstrances & de nostre
 grace speciale, pleine puis-
 sance & auctorité Royale:
 Nous auons dit, déclaré &

ordonné, & par ces presentes signées de nostre main, disons, declarons, ordonnons, voulōs & nous plaist, Que de toutes les places fortes soit Villes ou Chasteaux qui sont au milieu de nostre Royaume & des Prouinces d'iceluy non scituées en lieu de consequence soit pour frontiere ou autre consideration importante, les fortifications en soient razées & demolies, mesmes les anciennes murailles abattues, selon qu'il sera iugé nécessaire pour le bien & repos

de nos subjets & la seureté
de cet Estat , en sorte que
nosdits subjets ne puissent
desormais apprehender que
lesdites places soient pour
leur donner aucune incom-
modité, & que nous soyons
deschargez de la despenſe
que nous sommes contrains
de faire pour les garnisons.
Si donnons en mandement
à nos amez & feaux les
gens tenans nostre Cour de
Parlement à Paris, que ces
presentes nos Lettres de De-
claration ils facent lire, pu-
blier & registrer pour satisf-

faire au contenu en iceluy,
Nous donner aduis des places & lieux plus necessaires à demolir, & en ruiner les fortifications pour le repos de nos subjets & seureté de nosdites Prouinces, & des moyens plus propres & conuenables pour y paruenir & faire plus promptement, plus facilement & à moindre foule executer nostre presente volonté. Mandons aussi à tous les Gouverneurs & nos Lieutenans Generaux en toutes les Prouinces de cestuy nostre

Royaume, nous donner les
mesmes aduis, afin que cha-
cun contribuant à vn si bon
dessein nostre peuple en soit
plustost soulagé, Car tel est
nostre plaisir : En tesmoin
dequoy Nous auons faict
mettre nostre scel à celsdites
presentes. Donnée à Nantes
le dernier iour de Iuillet,
l'an de grace mil six cens
vingt-six, & de nostre regne
le dix-septiesme.

Signé,

LOVIS.

Et sur le reply, Par le Roy.

DE LOMENIE.

Et scellé du grand sceau
de cire iaune sur double
queuë.

Et encor sur ledit reply
est escrit :

*Leuës , publiées et Registrées,
Ouy et ce requerant le Procureur
General du Roy , pour estre exe-
cutées , gardees et obseruées selon
leur forme et teneur , et coppies
collationnées d'icelles enuoyées aux
Bailliages et Seneschaussées de ce
ressort , pour y estre pareillement
leuës , publiées, Registrées et exe-
cutées à la diligence des Substi-
tuts dudit Procureur General qui*

certifieront ladite Cour auoir ce
 faict au mois, dans lequel temps
 seront les Officiers desdits Baillia-
 ges et Seneschaussées tenus en-
 uoyer un estat des places fortes
 soient Villes ou Chasteaux estans
 dans l'estendue de leur ressort. A
 Paris en Parlement le septiesme
 iour de Septembre mil six cens
 vingt-six.

Signé,

DV TILLET.

33 MAY '90